



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“, broj: 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“ broj: 96/13 i 89/16) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj 103/08), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2017. GODINU HRVATSKE LISTE ZA LIVNO

Broj: 03-07-6-270/18
Sarajevo, 23. maj 2019. godine

SADRŽAJ

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS PREGLEDA I KONTROLE FINANSIJSKOG IZVJEŠTAJA	4
Predmet pregleda i kontrole.....	4
Cilj pregleda i kontrole	4
Obim pregleda i kontrole	5
4. PRETHODNE KONTROLE I REVIZIJE	5
5. NALAZI I PREPORUKE	5
5.1 NALAZI.....	5
5.2 PREPORUKE	6

MIŠLJENJE REVIZORA

Služba za reviziju finansiranja političkih stranaka je izvršila pregled godišnjeg finansijskog izvještaja Hrvatske liste za Livno za 2017. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom godišnjeg finansijskog izvještaja za 2017. godinu, utvrđeno je da je Hrvatska lista za Livno prekršila odredbe člana 11. stav (1) i člana 12. stav (1) i (4) Zakona o finansiranju političkih stranaka.

Na osnovu našeg pregleda, odnosno kontrole finansijskog izvještaja, osim gornjih napomena, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Hrvatske liste za Livno za 2017. godinu.

Pregled i kontrola finansijskih izvještaja provedeni su u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka. Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Hrvatska lista za Livno se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	0,00	0,00
2.	Prilozi fizičkih lica (3-a)	0,00	0,00
3.	Prilozi pravnih lica (3-b)	0,00	0,00
4.	Prihodi od imovine (3-c)	0,00	0,00
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	1.200,00	26,20
7.	Prihodi iz budžeta (3-f)	3.380,00	73,80
8.	Prihodi od propagande (3-g)	0,00	0,00
I	Ukupni prihodi (1-8)	4.580,00	100,00
II	Ostali prihodi i drugo	0,00	0,00
	Izvori finansiranja (I+II)	4.580,00	100,00

U godišnjem finansijskom izvještaju stranka je iskazala rashode u ukupnom iznosu od 3.475,56 KM.

2. PREDSTAVLJANJE POLITIČKE STRANKE

Naziv političke stranke je Hrvatska lista za Livno. Skraćeni naziv je HLzaLIVNO.

Hrvatska lista za Livno je registrovana kod Općinskog suda u Livnu, Rješenjem broj: 068-0-F1-16-000-002 od 15.04.2016. godine.

Sjedište stanke je u Livnu, Sinjska 4.

Lice ovlašteno za zastupanje Hrvatske liste za Livno je Jakov Perković, predsjednik stranke.

Lice ovlašteno za podnošenje finansijskih izvještaja za 2017. godinu također je Jakov Perković.

U godišnjem finansijskom izvještaju za 2017. godinu, Hrvatska lista za Livno je konstatovala da ima niže nivoe organizovanja, ali nije navela organizacionu strukturu.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Hrvatske liste za Livno za 2017. godinu.

Cilj pregleda i kontrole je da revizor na bazi finansijskih izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju

političkih stranaka. Ukoliko revizor na bazi kontrole finansijskog izvještaja utvrdi određena kršenja zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

Obim pregleda i kontrole finansijskih izvještaja Hrvatske liste za Livno obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskim izvještajima sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE KONTROLE I REVIZIJE

Služba za reviziju je izvršila pregled godišnjeg finansijskog izvještaja Hrvatske liste za Livno za 2016. godinu, nakon čega je izdat izvještaj o pregledu sa mišljenjem revizora, nalazima revizije i preporukama političkoj stranci: da izdaje potvrde u skladu sa članom 6. stav (1) Pravilnika o godišnjim finansijskim izvještajima političkih stranaka, da poslovne knjige vodi u skladu sa računovodstvenim propisima, odnosno da vodi pravilne evidencije o prihodima, rashodima i obavezama i da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka.

Nerealizovane preporuke:

Na osnovu uočenih nedostataka u godišnjem finansijskom izvještaju za 2017. godinu, utvrđeno je da politička stranka nije ispoštovala preporuke revizije.

5. NALAZI I PREPORUKE

5.1 NALAZI

Pregledom godišnjeg finansijskog izvještaja utvrđeno je da je Hrvatska lista za Livno prekršila odredbe člana 11. stav (1) i člana 12. stav (1) i (4) Zakona o finansiranju političkih stranaka.

Na osnovu finansijskog izvještaja, finansijske dokumentacije koju je dostavila politička stranka i revizijskih dokaza pribavljenih iz eksternih izvora, utvrđeno je da stranka nije vodila poslovne knjige u skladu sa računovodstvenim propisima¹, nije uspostavila potpune evidencije o svojim prihodima i rashodima² i godišnji finansijski izvještaj nije podnijela na način kako je propisala Centralna izborna komisija BiH³.

- Uvidom u finansijsku dokumentaciju utvrđeno je da je stranka u poslovnim knjigama i finansijskom izvještaju kao prihod iz budžeta, u iznosu od 1.000,00 KM, iskazala povrat svojih sredstava, odnosno povrat takse, koju je uplatila u prethodnoj godini na ime učešća na Lokalnim izborima 2016. godine.

¹ U skladu sa odredbom člana 11. stav (1) Zakona o finansiranju političkih stranaka, politička stranka je dužna voditi poslovne knjige u skladu sa računovodstvenim propisima.

² U skladu sa odredbom iz člana 12. stav (1) ovog Zakona dužna je uspostaviti evidencije o svim prihodima i rashodima

³ U skladu sa odredbom iz člana 12. stav (4) Zakona, politička stranka podnosi finansijski izvještaj u formi koju odobri Centralna izborna komisija BiH.

- U poslovnim knjigama stranka nije evidentirala nenovčanu donaciju koju je ostvarila korištenjem poslovnog prostora bez naknade. U finansijskom izvještaju, koji je podnijela Centralnoj izbornoj komisiji BiH, stranka je u obrascu 3 *Izvori finansiranja*, te obrascu 3-e *Nenovčane donacije i računi koje politička stranka nije imala obavezu platiti*, prijavila nenovčanu donaciju fizičkog lica u iznosu od 1.200,00 KM.
- Trošak zakupnine u iznosu od 1.200,00 KM stranka nije evidentirala u poslovnim knjigama, niti je trošak prijavila u finansijskom izvještaju.
- U finansijskom izvještaju, koji je podnijela Centralnoj izbornoj komisiji BiH, politička stranka je isplaćena sredstva, kojima je izmirila obaveze prema dobavljačima iz prethodne godine u iznosu od 1.810,00 KM i izvršila povrat pozajmica u iznosu od 1.050,00 KM prijavila kao troškove iz 2017. godine u ukupnom iznosu od 2.860,00 KM
- U finansijskom izvještaju stranka nije iskazala obavezu prema fizičkom licu po osnovu pozajmice u iznosu od 400,00 KM, a koje je iskazala u poslovnim knjigama.
- U finansijskom izvještaju, koji je podnijela Centralnoj izbornoj komisiji BiH, politička stranka je navela da ima niže nivoe organizovanja. Međutim, stranka nije navela organizacione dijelove, čime je prekršila odredbe člana 10. Pravilnika o godišnjim finansijskim izvještajima političkih stranaka.

5.2 PREPORUKE

Preporučuje se Hrvatskoj listi za Livno da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da uspostavi tačne evidencije o prihodima, rashodima i obavezama,*
- *da poslovne knjige vodi u skladu sa računovodstvenim propisima i*
- *da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka.*

KOMENTAR

Politička stranka se nije očitovala na nalaze revizije navedene u Preliminarnom izvještaju o pregledu godišnjeg finansijskog izvještaja za 2017. godinu.

Pomoćnik revizora

Mr.sc. Goran Cicović

Šef Službe za reviziju, revizor

Mr.sc. Hasida Gušić